

劉賓客文集
附補遺

一





劉賓客文集

附補遺

一

劉禹錫 著



中華書局

此據
排印
僅有
此本
初編
各
叢書
叢書
叢書
叢書



劉賓客文集

劉賓客文集卷一

唐 中山劉禹錫著

賦

問大鈞賦 并序

始余失臺郎爲刺史。又貶州司馬。俟罪朗州。三見閏月。人咸謂數之極。理當遷焉。因作謫九年賦。以自廣。是歲臘月。詔追明年。自闕下重領連山郡印綬。人咸曰。美惡周必復。第行無恤。歲杪其復乎。居五年。不得調。歲二月。有事於社。前一日致齋。孤居慮靜。滯念歎起。伊人理之。不可以曉也。將質諸神乎。謹貢誠馳。精敢問大鈞。其夕有遇。寤而次第其詞。以爲賦。

圓方相函兮。浩其無垠。宵冥翕闢兮。走三辰以騰振。孰主張是兮。有工其神。迎隨不見兮。強名之曰大鈞。欬以臨下兮。巍乎雄尊。天爲獨陽。高不可問。工居其中。與人差近。身執其權。心平其運。循名想象。斯可以訊。曰。嘻。蒙之未生。其猶泥耳。落乎埏埴。唯鈞所指。忽然爲人。爲幸大矣。上賦其形。七情與俱。嗇智不授。畀之以愚。坦坦之衢。萬人所趨。蒙一布武。化爲畏途。人或譽^平之。百說徒虛。人或排之。半言有餘。物壯則老。乃唯其常。否終則傾。亦不可長。老先期而驟至兮。否踰數而叵量。雖一夫之不獲兮。亦大化之攸病。謹薦誠上問兮。俛伏以聽。是夕寢熟。夢遊乎無何有之鄉。抗陸級於重霄兮。異人間之景光。中有威神。巾金甲。

而煒煌。領命一作之使前兮。其音琅琅。曰。吾大化之一工也。居上臨下。廉其不平。汝今有辭。吾一以聽。播形宵貌。生類積億。橐籥闔匡。鎔鍊消息。我之司智。初不爾嗇。不守以愚。覆爲汝賊。旣賦汝形。輔之聰明。盡求世師。資適攸宜。胡然抗志。遐想前烈。倚梯青冥。舉足斯跌。韜爾智斧。無爲自伐。鑿竅太繁。天和乃洩。利逕前誘。多逢覆轍。名腸內煎。外火非熱。今哀汝窮。將厚汝愚。剔去剛健。納之柔濡。塞前竅之傷痕兮。招太和而與居。貫以待人兮。急以自拘。道存靈奧。無示四隅。軋物之勢。不作兮。見傷之機。自無。汝不善用。吾焉嗇乎。且夫貞而騰氣者。臙臙健而垂精者。昊昊我居其中。猶輪是蹈。以不息爲體。以日新爲道。保鱗蜚走。灌莽苞阜。乃牙乃甲。乃殪乃剖。陽榮陰悴。生濡死薨。各乘氣化。不以意造。賦大運兮。無有淑慝。彼多方兮。自生醜好。爾奚不德。余以驩壯。姑尤我以速老。邪。觀汝百爲。又或不然。赤子哇哇。忽其能言。亦旣名物。幾時踟躕。春耕其邱。投種之日。釋耒而歎。何時實粟。望所未至。謂余舒舒。欲其久留。謂我警如。我一子二。誰之曲歟。彼兼葭之蒼蒼兮。霜霰苦而中堅。松竹之皴皴索籊兮。不若樛筍之可憐。納材革而構明堂兮。固容消而力完。揚且之哲兮。不可以常然。當錫爾以老成。蒼眉皓顙。山立時行。去敵氣與矜色兮。噤危言以端誠。俾人望之。侮黷不生。爾之所得。孰與壯多。不善處老。問余而何。受教而回。遽遽形開。嚮之威神。孰爲來哉。乃遽衣促盥。端慮滌想。委佩低簪。持簿叩額。而言曰。楚臣天問不酬。今臣過幸。一獻三售。始厚以愚。終期以壽。忘上問之罪。濯已然之咎。心憎故術。腹飽新授。馳神清玄。拜手稽首兮。

南方氣泄而雨淫。地慝而傷物。媼神噫淫。淪色壞味。雖金之堅。亦失恆性。始余有佩刀甚良。至是澀不可拔。剖其室乃出。遡陽眇眇。傳刃蒙脊。鱗然如瘡痂。如黑子。如青蠅之惡。銳氣中錮。猶人被病然。客有聞焉。裹一作真。密石以遺余。沃之草腴。雜以烏膏。切劇下上。真質焯見。躊躇四顧。適余周爾謝客。微子之貽。幾喪吾寶。客曰。吾聞諸梅福曰。爵祿者。天下之砥石也。高皇帝所以礪世摩鈍。有是邪。余退感其言。作砥石賦。我有利金兮。以利爲佩。遭土卑而慝作兮。雄鉞爲之潛晦。如景昏而蝕既兮。與肌漆而爲癘。顧秋蓬之不可刺兮。尙何遊乎髀髀之外。利物蒙蔽。材人惆悵。俾百汰之至精。蟠一檢而多恙。豈害氣之獨然兮。將久不試而然。彼屠者之刀一作刀。今獵者之鉞。不灌不淬兮。揉一作錯銜鉛。日鼓月揮兮。剗腴擊鮮。睨一作燿燿以耀芒。蕞淫夷而騰羶。豈不涉暑而蒙沴兮。鼎用之而成妍。有客自東。遺余越砥。圭形石質。蒼色膩理。剗其鱗皴。滑以滌瀦。如衣澣垢。如鼎出否。霧盡披天。萍開見水。拭寒焰以破眚。擊清音而振耳。故態復還。寶心再起。既賦形以終用。一蒙垢焉何恥。感利鈍之有時兮。寄雄心於瞻視。嗟乎。石以砥焉。化鈍爲利。法以砥焉。化愚爲智。武王得之。商俗以厚。高帝得之。傑材以奏。得既有自。失豈無因。漢氏以還。三光景分。隨道闊狹。用之得人。五百餘年。唐風始振。懸此大砥。以勸兆民。播生在天。成器在君。天爲物君。君爲人天。安有執礪世之具。而患乎無賢歟。

楚望賦并序

予既謫於武陵。其地故郢之裔邑。與夜郎諸夷錯雜。繫乎天者。陰伏陽驕。是已。一無此二字下同繫乎人者。風巫

氣盛是已。一有是二字。霏氛浮浮，利於樓居。城之麗譙，實鄰所舍。四垂無蔽，萬景並入。因道其遠邇所得，爲楚望賦云。

翼軫之野，祝融司方。陰迫而專，專實生沴。天濡而冱，土洩而泥。氣罕淑清兮，淫氛疇曠。中人體支兮，爲瘡爲瘵。以曠滌煩兮，利居高於物外。我卜我居，於城之隅。宛在落落麗譙渠，四阿垂空。洞戶發樞，眸子不運。坐凌虛無，歲更周流。時極慘舒，萬象起滅。森來睨子，樞軒之外。羣山巖嵒，岡陵靡陀。勢若相拱，出雲見怪。竊蔚森聳，露夕霞朝。望如飛動，簷廡之下。大江頽洞，支流合輸。泄入雲夢，羲和望舒。出沒兩涯，涵泳之族。聲牙一作，啟呀。秋水灌盈，漩石飄沙。流棹軒昂，舞於盤渦。逮及收潦，澹如醪醕。白石磷磷，倒影羅生。蘋末風起，有文無聲。悠遠烟緜，與空蒼然。湘沅之春，先令而行。臘月寒盡，溫風發榮。土膏如濡，言鳥嚶嚶。三星嚳其曉中，植物颯以飄英。雲歸高唐，草蔽洞庭。目與天盡，神將化并。圓方相涵，遊氣香冥。熙熙藹藹，藻飾羣形。枿樹童邱，積空凝青。環洲曲塘，含景曜明。恢台之氣，發於春季。涉夏如鑠，逮秋愈熾。土山焦熬，止水潢沸。翔禽跼墮，咼味垂翅。曦赫敲蒸，陽極反陰。二儀交精，下上相歆。雲與天際，歛苦車蓋。凝矚未瞬，彌漫霽野。驚雷出火，喬木糜碎。殷地熱空，萬夫皆廢。懸霤綆絕，日中見昧。移晷而收，野無完塊。少陰之中，景物澄鮮。丹葉星房，燭耀川原。夕月既望，曜於丹泉。上鏡下冰，漪塵濯烟。宿麗潛芒，獨行高躔。皓一氣之悠然，潔有形而溢清玄。杳微明而斐亹，想遊目於化先。夜無睖以徂征，金霞暈乎海壖。明星方揚，斜漢西懸。璿柄如墮，半沈層瀾。雞鳴晰而晨鳴兮，日荏苒以騰晶。動植瞭兮已分，山川鬱乎不平。復人寰之誼卑，洵

浩浩以營營。追向時之景光。不可驟得以再更。意華胥之夢還。獨仿像而馳精。日次於房。天未降霜。百卉
猶澤。水泉收脉。故道脩削。衍爲廣斥。水禽嬉戲。引吭伸翮。紛驚鳴而決起。拾綵翠於沙礫。時時北風。振
槁揚埃。蕭條邊聲。與鴈俱來。寒氛委積。萬竅交激。楚雲改容。飛雨凝滴。灑林遞響。淅瀝梢械。飛電照雪。以
騰光。柔蔬傲霜而透垆。躔次殊氣。川谷異宜。民生其間。俗鬼言夷。招三閭以成謠。德伏波而構祠。投粒糗
尼呂。以鼓枳。釜鱸鮐而如犧。蟠木靚深。孽妖憑之。祈年祛癘。蠲敬祇威。擊鼓肆筵。河旁水涓。薦誠致祝。卻
略躑躅。兒見靈光賦。洛居蠡食。大掩水物。罟張餌啗。不可遁伏。顯舉潛緹。晝撞夜觸。設機沈深。如拾於陸。
彼遊儻之瑣類。咸跳脫於窘束。雖三趾與六眸。時或加乎一日。亦有輕舟。軒輕泛浮。掄綸往復。馴鷗相逐。
莫夜澄寂。嘯歌羣族。僮音俚態。幽怨委曲。逗疎柝於江城。引哀猿於山木。巢山之徒。捫木開田。灼龜伺澤。
兆食而燔。鬱攸起於巖阿。騰絳氣而蔽天。熏歇雨瀟。賴垂林巔。盜天和而藉地勢。諒無勞而有年。罷士閑
人逸。爲未作。求金渚涘。淘汰邊澗。流注瀟沱。繁光熠燿。貪賈來貿。發於懷握。無翼而飛。潤於豐屋。哂耕耘
之悒悒。徒胼胝以自鞠。我處層軒。日星迴還。閱天數而視民風。百態變見乎其間。非耳剽而臆說兮。固幽
求而縱觀。觀物之餘。遂觀我生。何廣覆與厚載。豈有形而無情。高莫高兮九閭。遠莫遠兮故園。舟有櫂兮
車有轄。江山坐兮不可越。吾又安知其所如。悅臨高以觀物。

傷往賦 并序

人之所以取貴於蜚走者情也。而誕者以遣情爲智。豈至言邪。予授室九年而鰥。痛苦人之天。閱弗遂也。

作賦以傷之。冀夫覽者有以增伉儷之重云。

歎獨處之悵悵兮。憤伊人之我遺。情可殺而猶毒。境當歡而復悲。人或朝歎而莫息。夫何越月而踰時。太極運乎三辰。轉寒暑而下馳。有歸於無兮。盛復於衰。猶味爽之必莫。又安得而怨咨。我今怨夫若人兮。曾思且而潛暉。飄零日及之萼。日及種也。朝生暮落。一名王燕出爾。倏忽蜉蝣之衣。川走下而不還。露迎陽而易晞。恩已甚兮。難絕。見無期兮。永思。我行其野。農氏桑者。舉桮來饋。亦在林下。我觀於途。裨販之夫。同荷均挈。荆釵布襦。羽毛之薺。鱗介之微。和鳴灌叢。雙泳漣漪。薨薨伊蟲。蠢蠢伊豸。遊空穴深。兩兩相比。何動類之萬殊。必雄雌而與俱。物莫失儷以孤處。我方踽踽而焉如。我復虛室。目淒涼兮。心伊鬱。心伊鬱兮。將語誰坐。匡牀兮。撫嬰兒。何所丐沐兮。何從仰飴。襦袴在身兮。昔園畦跌。盤囊附臂兮。餘馥臧韃。誠口性之全惑。顧童心兮。如疑曉然。有難繼之慕。漠然滅好弄之姿。指遺桂兮。能認遡空帷兮。欲歸。我入寢宮。痛人亡兮。物改其容。寶瑟偃一作兮。絃柱綠瑤臺。傾兮鏡奩空。寒釭委灰。虛幌多風。隙駒晨轉。窗蟾夜通。步搖昏兮。網黏翡翠。芳褥掩兮。塵化蛩蛩。閱刀尺之餘澤。自巾箱之故封。玩服儼兮。猶具繁華。謝兮。焉從想。翩躚於是。非求憲宰與冥蒙。信奇術之可致。嗟此生兮。不逢。徒注視以寂聽。悅神疲而目窮。還抱影以獨出。紛百哀而攻中。系曰。龍門風霜苦。別鶴哀鳴夜。銜羽吳江波。浪深雌劍一去無遺音。悲之來兮。憤予心。洵如行波滄浸。淫恨緣情而莫極。思執禮以自箴。已焉哉。苒苒生死。悠悠古今。乘彼一氣兮。聚散相尋。或鼓而興。或罷而沈。以無涯之情愛。悼不駐之光陰。諒自迷其有分。徒終怨於匪忱。彼蒙莊兮。何人。予獨累歎而長吟。

何卜賦

余既幼感力命之說兮。身久放而愈疑。心回穴其莫曉兮。將取質夫秉龜。楚人俗巫而好術兮。叟有鬻卜而來思。乃招而祝之曰。嘻。人莫不塞。有時而通。伊我兮久而愈窮。人莫不病。有時而間。伊我兮久而滋蔓。我聞人肖五行。動止有則。四時轉續。變於所極。一歲之旱。人斯具舟。三月之熱。人斯具裘。極必反焉。其猶合符子一作子下同。首圓而足方。予腹陰而背陽。胡形象之有肖。而變化之殊常。經曰。剝極則貴。居貴而未嘗剝者。其誰否。極受泰。居否而未嘗泰者。又其誰。鶴胡不截。鳧胡不裨。變何罰而蹢躅。蚊何功而扶持。紛紜恣睢。交作舛馳。似予似奪。似信似欺。孰主張之。問於子龜。卜者曰。招我以粗。問我以微。有天下之是非。有人人之是非。在此爲美兮。在彼爲嗤。或昔而成。或今而虧。君問曷由主張其時。時乎時乎。去不可邀。來不可逃。淹淹兮孰捨孰操。豕喙之毒董。雞首之賤毛。各於其時。而伯音霸其曹。屠龍之伎。非曰不偉。時無所用。莫若履豨。作俑之工。非曰可珍。時有所用。貴於斲輪。絡首靡足兮。驥不能踰。一無字跬前無所阻兮。跛鼃千里。同涉於川。其時在風。沿者之吉。泝者之凶。同藝於野。其時在澤。伊穰之利。乃穆之厄。故曰是邪非邪。主者時邪。諒淑惡之同出兮。顧所丁之若何。夫如是。得非我美。失非我恥。其去曷思。其來曷期。姑蹈常而俟之。夫何卜爲。言訖。執龜而起。予退而作何卜賦。於是蹈道之心。一而俟時之志。堅內視羣疑。猶冰釋然。

謫九年賦

古稱思婦已歷九秋。未必有是。舉爲深愁。莫高者天。莫濬者泉。推以極數。無踰九焉。伊我之謫。至於數極。

長沙之悲。三倍其時。廷尉不調。行當跂而。天有寒暑。閏餘三變。朝有考績。幽明三見。顧堯之民兮。亦昏墊而有歎。歎息兮。倘伴登高。高兮望蒼蒼。突弁之夫。我未始黃。合抱之木。我來猶芒。山增昔容。水改故防。童者鬱鬱。而凋者洋洋。天覆地生。蓊兮無傷。彼族而居。曷之投荒。彼軒而遊。昨日桁楊。信及澤濡。俄然復常。稽天道與人紀。咸一債而一起。去無久而不還。焚無久而不理。何我道之一窮兮。貫九年而猶爾。噫。不可得而知。庸詎得而悲。苟變化之莫及兮。又安用夫肖天地之形爲。

望賦

邈不語兮。臨風。境自外兮。感從中。晦明轉續兮。八極鴻濛。上下交氣兮。羣生異容。發孤照於寸眸。驚遐情乎大空。物變化兮。多象人遇時兮。不同。嗟乎。有目者必騁望。以盡意。當望者必緣情。而感時。有待者瞿瞿。忘懷者熙熙。慮深者瞠然若喪。樂極者沖然無遠。外徙倚其如一。中紕紛兮。若斯。望如何。其望最樂。晞慶霄兮。迺阿閣。如雲兮。天顏咫尺。如草兮。臣心踊躍。扇交翟兮。葳蕤旗升。龍兮。螭略日轉黃道。天開碧落。凝瑞景於庭樹。掬非烟於殿幕。望如何。其望且懽。登瀛岸兮。見長安。紛擾擾兮。紅塵合。鬱蔥蔥兮。佳氣盤池。象漢兮。昭回。城依斗兮。闌干。避御史之驄馬。逐倖臣之金丸。望如何。其望攸好。宗萬靈兮。越四隩。漢帝仙臺兮。秦皇海嶠。霓衣踴於河上。馬跡窮乎越徼。紫氣度關而斐亶。神光屬天而照耀。睨眷眷以馳精。聳專專而觀妙。望如何。其望有形。視蠢蠢兮。窮冥冥。楚塞氛惡兮。蕭關燧明。暈籠孤月。角奮長庚。沙多似雪。磧有疑城。烟雲非女子之氣。草木盡王者之兵。審曳柴之虛警。破來騎之先聲。信有得於風鳥。示無言於旆。

旌望如何其望且慕。恩意隔今年光度。雕輦已辭兮。金屋何處。長信草生兮。長門日暮。後翠華之儻來。仰
玄天以自訴。況復湘水無還。漳河空注。淚染枝葉。香餘執素。風蕭蕭兮。北渚波烟漠漠兮。西陵樹。夫不歸
兮。江上石。子可見兮。秦原墓。拍琴翻朔塞之音。挾瑟指邯鄲之路。望如何其望最傷。侯環玦兮。思帝鄉。龍
門不見兮。雲霧蒼蒼。喬木何許兮。山高水長。春之氣兮。說萬族。獨含嘯兮。千里目。秋之景兮。懸清光。偏結
憤兮。九回腸。羨環拱於白榆。惜馳暉於落棠。諒衡斗兮。誰見伊戴盆兮。何望平聲。豈止蘇武在胡。管甯浮海。
送飛鴻之滅沒。附陰火之光彩。鶴頸長引。烏頭未改。恨已極兮。平原空起。何時兮。東山在。永望如何。傷懷
孔多。降將有依風之感。宮人成憶月之歌。歌曰。張衡側身愁思久。王粲登樓日回首。不作渭濱垂釣臣。羞
爲洛陽拜塵友。

山陽城賦 井序

山陽故城。遺趾數雉。四百之運。終於此墟。裔孫作賦。蓋閔漢也。詞曰。
我止行車。賈涕於山陽之墟。是何蒼莽與慘悴。春陵之氣兮。焉如。踣昌運於四百。辭至尊而伍匹夫。有利
器而倒持兮。曾何芒刃之足舒。懿王迹之肇基。暨坤維之再敷。邈汜陽與鄩上。悅蛇變而龍蹙。痛人亡而
事替。終此地焉。忽諸嗟乎。積是爲治。積非成虐。文景之欲。處身以約。播其德芽。迄武乃穫。桓靈之欲。縱心
於特。爇其妖焰。逮獻而焚。彼伊周不世兮。奸雄乘釁而騰振。物象摧以易位。被虛號而陽尊。終世殫而事
去。胡竊揖讓以爲文。嗚呼。維神器之至重兮。蓋如山之不羈。使人得譬乎逐鹿。固健步者所先。諒人事之

云爾。孰云當塗之兆也。自天亂曰。久矣莫可追。陞彼墟兮。噫嘻。獨遺武兮。貽後王之元龜。

秋聲賦 井序

相國中山公賦秋聲。以屬天官太常伯。唱和俱絕。然皆得時行道之餘興。猶有光陰之歎。況伊鬱老病者乎。吟之斐然。以寄孤憤。

碧天如水兮。窅窅悠悠。百蟲迎莫兮。萬葉吟秋。欲辭林而蕭颯。潛命侶以啁啾。送將歸兮。臨水。非我土兮。登樓。晚枝多露。蟬之思夕。蔓趣寒蟬之愁。至若松竹含韻。梧楸蚤脫。驚綺疏之曉吹。墮碧砌之涼月。念塞外之征行。顧閨中之騷屑。夜蛩鳴兮。機杼促。朔雁叫兮。音書絕。遠杵續兮。何冷冷。虛窗靜兮。空切切。如吟如嘯。非竹非絲。當自然之宮徵。動終歲之別離。廢井苔合。一作冷。荒園露滋。草蒼蒼兮。人寂寂。樹槭槭兮。蟲啾啾。則有安石風流。巨源多可。平六符而佐主。施九流而自我。猶復感陰蟲之鳴軒。歎涼葉之初墮。異宋玉之悲傷。覺潘郎之么麼。嗟乎。驥伏櫪而已老。鷹在韝而有情。聆朔風而心動。眄天籟而神驚。力將瘳兮。足受紲。猶奮迅於秋聲。

劉賓客文集卷二

碑

唐興元節度使王公先廟碑

唐制五等有爵服而無山川登於三事得立四廟。備物崇祀以交神明。敬先報本以輔孝治。有國之令典也。維長慶三年前相國王公始卜廟於西京崇業里。公時鎮劍南東川。上章曰。臣涯官秩印綬品俱第三。請如式以奉宗廟。制曰。可。是歲仲冬。申命長男孟堅。祔其主於三室。明年公入爲御史大夫。復以十二月躬行蒸祭。間歲公出梁州。就拜司空。禮崇異數。廟加祀室。太和二年。增新室。旣成。祔顯考於尊位。告饗。由禮觀之者。以爲世程。第一室曰。上儀同。幽州別駕府君諱元政。以妣博陵崔氏配。第二室曰。湖州安吉縣令。贈尙書刑部員外郎府君諱實。以妣贈扶風縣太君馬氏配。第三室曰。朝散大夫青州司馬贈戶部侍郎府君諱祚。以妣贈武威郡太夫人賈氏配。第四室曰。溫州刺史贈太尉府君諱冕。以妣贈魯國太夫人博陵崔氏配。初周靈王太子晉遇浮邱公。化爲神仙。時人號曰王家。其後遂以命氏。顯於秦者曰。翦三世將秦師。子孫分居晉代間。東漢有徵君霸。霸孫甲亦號徵君。徙居祁縣爲著姓。故至於今爲太原人。自漢涉魏益以熾昌。凡十葉。至後魏度支尙書廣陽侯罔。廣陽有二子。神念神感。神念南奔梁。神感北仕齊。惟儀同府君廣陽侯五代孫也。唐興於太原。實從義旗佐成王業。故有開府儀同之寵。惟刑部府君以功臣

子理二邑。不躋貴仕。故有錫羨後大之祥。惟戶部府君幼孤。以孝聞於鄉曲。未冠。以文售於有司。由前進士補延州臨安縣主簿。會詔徵賢良。策在甲科。授瀛州饒陽尉。歲滿遷渭南。天后在神都。而東畿差重。遂由渭南轉河陽。適逢建萬象神宮。旬內吏分董其役。因上書切諫。繇是名益聞。開元初。以大理司直。馳軺車聯識大獄。閩禺朔漢所至決平。蚤以鑿棘傷生。晚成劇恙。樂就夷曠。故不至大官。惟太尉府君生於治平時。以文學自奮。年十有五。賁然從秋賦。明年春。升名於司徒。又一年。玄宗御層樓。發德音。懸文詞政術科。以置髦士。府君策最高。授太常寺太祝。未幾。復以能通道德。南華沖虛三真經。進整厓尉。天寶中。歷右拾遺。左補闕。禮部司駕。二外郎。屬幽陵亂華。遣兵南服。因佐閩粵。改檢校比部郎中。行軍司馬。時中原甫甯。江南爲吉地。二千石多用名德。乃以府君牧溫州。朝廷虛公卿以俟高第。及聞訃。永嘉人輟春罷社。搢紳間以不淑相弔焉。雖位負於道。而邁德垂矩。後之人得以續承丕揚之。其儲休啓祐。有自云爾。生三子。皆聰明絕人。長曰沼。以神童仕。至檢校禮部郎中。次曰潔。以奇文仕。至國子司業。今代郡公實季子也。蚤在文士藉。射策連中。咸世其家。貞元中。德宗聞其名。自藍田尉召入禁中。視草。厥後三典書命。再參內廷。憲宗器之。付以國柄。翊贊有道。雖冊免常居大僚。今年自梁州請覲。上思有舊臣爲羽儀。遂領太常。其公府如故。以一心事六君。顯官重務。靡不揚歷。且夫起諸生。至三公。而心愈卑。道益廣。出授黃鉞。以伯諸侯。入服華章。以謁家廟。追崇極大位。血食備多室。享全榮而奉昭薦。嗚呼。公侯之孝歟。宜書廟器。以視喬公之三鼎。其辭曰。

闕宇神庭。邃清而嚴。上公之儀。四室耽耽。犧以潔牲。粢以大糝。交神尙敬。合魄尙氣。子姪宗工。駿奔奉事。副筭侈袂。儼恪居次。孝孫兢兢。執爵而升。以裸以濯。以伏以興。水陸具來。羶薌畢登。列於園方。其器增增。乃禴乃嘗。敬而追遠。二昭二穆。孝以尊本。瞻瞻几幄。蹻蹻堂堂。禮成起慕。涕落玄袞。濡露踐霜。誰無永懷。不如達者。哀與榮偕。逢時奮庸。誰不得位。不如仁人。以道爲貴。惟公之達兮。名以顯親。惟公之仁兮。德以澡身。六朝之清臣。一代之全人。宜其世家翼翼。振振罔不祇肅於廟之門。

東都留守令狐氏家廟碑

今上元年七月十三日。汴州刺史。宣武軍節度副大使。知節度事。汴宋亳等州觀察處置使。銀青光祿大夫。檢校禮部尙書。兼御史大夫。上柱國。彭陽縣開國伯令狐公。西嚮拜章上言。守臣楚蒙被恩澤。列爲元侯。得立家廟。以奉常祀。制書下其奏於有司。於是善相考祥。得地於京師通濟里。居無何。新廟成。公以守藩故。申命季弟監察御史。定卜牲練日。越八月丁亥。耐饗三室。培塿以尙幽。設幄以迎精。禮無尤違。神用甯謐。第一室曰。秦州上邽縣尉諱濬。以妣太原王氏配。第二室曰。絳州昌明縣令。贈吏部尙書諱崇亮。以妣贈太原郡夫人河東柳氏配。第三室曰。太原府功曹參軍。贈太子太保諱承簡。以妣贈魏國太夫人富春孫氏配。明年十月。公由浚郊。以介圭入覲。眞拜戶部尙書。進爵爲魯侯。既辭戎旃。得以列侯謁三廟。是歲南至。上不視朝。又得以時展祭。先期致齋。栗然以敬。既齋盡志。歆然永思。奉其百順。陳以具物。始躋而虔恭。終獻而汎瀾。既卒事。顧麗牲之石。宜有刊紀。乃俾家老。授其牒於所知。云令狐晉邑也。晉大夫魏顆。